

**ADRODDIAD I:** PWYLLGOR CRAFFU CYMUNEDAU (TROSEDD AC ANHREFN)  
AWDURDOD LLEOL GWYNEDD

**DYDDIAD:** 22 HYDREF 2020

**ADRODDIAD GAN:** Y CYNGHORYDD DAFYDD MEURIG  
(SWYDDOG CEFNOGI - CATHERINE E ROBERTS)

**PWNC:** DIWEDDARIAD BLYNYDDOL GAN Y BARTNERIAETH  
DIOGELWCH CYMUNEDOL (GWYNEDD A MÔN)

<b>1.00</b>	<b>PWRPAS YR ADRODDIAD</b>
1.01	Rhoi trosolwg i Aelodau o weithgareddau Partneriaeth Diogelwch Cymunedol (PDC) Gwynedd a Môn yn ystod 2019-20, a'r datblygiadau ar gyfer 2020-21.
<b>2.00</b>	<b>CEFNDIR</b>
2.01	<p>Mae gofyn i'r Bartneriaeth Diogelwch Cymunedol adrodd yn ffurfiol i'r pwyllgor hwn bob blwyddyn er mwyn cyflwyno trosolwg. Mae hyn yn sicrhau bod y Bartneriaeth yn cyflawni ei hymrwymadau yn unol ag adrannau 19 a 20, Deddf Heddlu a Chyfiawnder Troseddol 2006.</p> <p><b>Dyletswydd y pwyllgor yw craffu gwaith y Bartneriaeth, yn hytrach na gwaith yr aelodau (cyrff) unigol.</b></p>
2.02	<p>Mae dyletswydd statudol ar <b>Awdurdodau Lleol</b> yn unol â Deddf Trosedd ac Anhrefn 1998, a'r diwygiadau dilynol yn sgîl Deddf Heddlu a Chyfiawnder Troseddol yn 2002 a 2006 i weithio mewn partneriaeth gyda'r <b>Heddlu, y Gwasanaeth Iechyd, y Gwasanaeth Prawf a'r Gwasanaeth Tân ac Achub</b>, i ymdrin â'r rhaglen diogelwch cymunedol leol. Dyma'r prif asiantaethau sy'n ffurfio'r Bartneriaeth Diogelwch Cymunedol.</p> <p><b>Yn wreiddiol, galwyd partneriaethau diogelwch cymunedol yn bartneriaethau trosedd ac anhrefn, ac er bod yr enw wedi'i newid, nid yw'r cyfrifoldebau, maent yn parhau i fod -</b></p> <ul style="list-style-type: none"> <li>• Throsedd ac Anhrefn</li> <li>• Camddefnyddio Sylweddau</li> <li>• Lleihau Aildroseddu</li> <li>• Cyflwyno asesiad strategol i adnabod blaenoriaethau (gwaith sydd bellach yn cael ei wneud yn rhanbarthol)</li> <li>• Rhoi cynlluniau ar waith i ymdrin â'r blaenoriaethau hyn (mae cynllun bellach yn bodoli ar sail ranbarthol a lleol)</li> </ul>
2.03	Mae partneriaeth wedi bodoli yn Ynys Môn a Gwynedd ers 1998. Fodd bynnag, mae wedi gweithredu fel Partneriaeth ddwy-sir ers nifer o flynyddoedd bellach.

<b>3.00</b>	<b>BLAENORIAETHAU/DOGFENNAU'R BARTNERIAETH AR GYFER CRAFFU</b>
3.01	<p>Mae'r bartneriaeth yn gweithio'n unol â chynllun blynyddol, sy'n seiliedig ar gynllun rhanbarthol tair blynedd.</p> <p>Atodir –</p> <ul style="list-style-type: none"> <li>• Cynllun blynyddol 2019 -20 y bartneriaeth – yn dangos sefyllfa pob gweithred ar ddiwedd y flwyddyn.</li> <li>• Cynllun cyfredol y bartneriaeth, sydd mewn lle ers Ebrill flwyddyn yma.</li> </ul>
3.02	<p>Mae saith blaenoriaeth yn denu sylw'r Bartneriaeth. Mae'r blaenoriaethau hyn yn seiliedig ar asesiad strategol. Y blaenoriaethau yw -</p> <ul style="list-style-type: none"> <li>• Lleihau troseddau a chanddynt ddiodefwr (troseddau meddiangar yn unig)</li> <li>• Lleihau Ymddygiad Gwrthgymdeithasol</li> <li>• Cefnogi pobl fregus i'w hatal rhag bod yn ddiodefwr trosedd</li> <li>• Codi hyder i adrodd am ddigwyddiadau o gam-drin domestig</li> <li>• Codi hyder i adrodd am gam-drin rhywiol</li> <li>• Mynd i'r afael â chamddefnyddio sylweddau yn yr ardal</li> <li>• Lleihau Aildroseddu</li> </ul>
<b>4.00</b>	<b>TROSOLWG O LEFELAU TROSEDDU DROS Y CYFNOD ADRODD -</b>
	<ul style="list-style-type: none"> <li>• Wrth fesur lefelau trosedd, mae'n bwysig bod gennym sail ar gyfer cofnodi, sy'n caniatáu cymhariaeth â phersbectif. Mae'r Swyddfa Gartref (SG) yn monitro lefelau troseddau ar draws holl heddluoedd y DU. Un o'r paramedrau maen nhw'n eu defnyddio i gynnal trosolwg yw cynghrair gymhariaeth o fath, sef <i>grwpiau mwyaf tebyg</i> (GMT). Mae'r SG yn llunio grwpiau o Siroedd, lle mae'r ddemograffeg mor debyg, y byddai disgwyl i lefelau troseddu fod yn debyg iawn hefyd.</li> <li>• Mae'r ddwy Sir yn amrywio o gwmpas y cyfartaledd ar gyfer ein GMT - gydag amrywiadau'n cael eu dadansoddi ymhellach, os a phryd mae angen.</li> <li>• Mae'r Heddlu'n edrych ar ffigurau trosedd yn gyson, ac yn adolygu pob newid yn rhanbarthol ac yn lleol. Mae unrhyw newidiadau sylweddol yn destun dadansoddiad pellach. Yna bydd meysydd problemus yn cael eu hadolygu, gyda chynlluniau Plismona ar waith i fynd i'r afael â'r materion. Mae dulliau plismona lleol yn cynnwys gosod adnoddau bob dydd i fynd i'r afael â materion wrth iddynt ddod i'r amlwg.</li> <li>• Mae'r Bartneriaeth yn derbyn data ar lefelau troseddu bob chwarter, a bydd y dulliau 'meddal' neu dymor hir o fynd i'r afael â thueddiadau trosedd yn sail i'r cynllun partneriaeth. (Yn ystod y cyfnod cloi, derbyniwyd data ar sail 2-3 wythnos). Y data a ddefnyddiwn yn gyffredinol yw data cymhariaeth rhwng y cyfnod yn y flwyddyn gyfredol, a'r un cyfnod yn y flwyddyn flaenorol, er yr edrychir ar dueddiadau 5 mlynedd hefyd fel yr angen.</li> <li>• Mae gan y Bartneriaeth ddyletswydd statudol i ymateb i asesiad strategol o dueddiadau trosedd, a pharatoi cynllun yn seiliedig ar yr asesiad hwn. Ar hyn o bryd, cynhelir yr asesiad ar sail ranbarthol, gyda chynllun 3 blynedd ar waith, ac yna mae'n hidlo i lawr i gynllun blwyddyn fwy lleol.</li> </ul>

	<ul style="list-style-type: none"> <li>• Yn gynnar yn y flwyddyn hon, oherwydd y sefyllfa cloi, gostyngodd y niferoedd o droseddau, o bob math, a adroddwyd i'r Heddlu. Roedd hyn wrth gwrs, i'w weld ledled y Wlad. Roedd y gostyngiad mwyaf sylweddol mewn troseddau meddiangar o bob math, a throseddau treisgar. Roedd troseddau yn gyffredinol wedi gostwng 29% ar draws Gogledd Cymru ym mis Mai eleni, ychydig yn llai yn Ynys Môn a Gwynedd (29% yw'r cyfartaledd). Ddiwedd mis Mehefin trwy fis Gorffennaf, dechreuodd y ffigurau troseddau a gofnodwyd cynyddu, ac erbyn canol mis Medi roeddent yn dychwelyd i gyfraddau cyn y cyfnod cloi. Fodd bynnag, mae bron pob math o drosedd yn dal yn is na'r adeg hon y llynedd gyda rhai, trais gydag anafiadau a throseddau meddiangar, yn sylweddol is. Ond mae rhai mathau o droseddau wedi gweld cynnydd; Mae troseddau domestig bellach yn dychwelyd i gyfraddau cyn cloi, y rhagwelwyd, ac mae ymyriadau wedi'u rhoi ar waith yn ystod yr ychydig fisoedd diwethaf i fynd i'r afael â hyn.</li> <li>• Dau faes lle gwelir niferoedd cynyddol yw stelcio ac aflonyddu, a throseddau casineb. Mae dadansoddiad pellach wedi dangos bod y cynnydd mewn stelcio ac aflonyddu yn bennaf oherwydd fod troseddau rheoli gorfodol, nawr yn cael eu cofnodi yn y categori aflonyddu a hefyd y cynnydd mewn adroddiadau o aflonyddu yn digwydd ar gyfryngau cymdeithasol a thrwy apiau negeseuon. Mae'r Bartneriaeth yn edrych i baratoi ymgyrch ymwybyddiaeth o ran defnyddio platfformau cyfryngau cymdeithasol yn briodol. Yn yr un modd, mae'r cynnydd mewn troseddau casineb (er bod y niferoedd yma'n isel iawn) wedi bod yn gysylltiedig i raddau helaeth â thensiynau rhwng unigolion sy'n arwain at gam-drin geiriol, sydd yn anffodus yn cael ei weld ledled y Wlad wrth fod symudiadau pobl yn ystod cyfyngiadau Covid yn gallu achosi ffrithiant. Mae'r Heddlu'n ymateb i bob adroddiad o droseddau casineb ac ymchwilir iddynt yn llawn.</li> </ul>
<b>5.00</b>	<b>2019 -20</b>
5.01	<ul style="list-style-type: none"> <li>• Mae'n werth nodi bod y bartneriaeth diogelwch Cymunedol bellach wedi bodoli ers 22 mlynedd, yn ddiweddarach, fel partneriaeth dwy Sir. Mae'r newidiadau y mae'r bartneriaeth wedi'u hwynebu dros y blynyddoedd yn niferus. Yn wir, gellir dweud nad yw'r dirwedd heddiw yn edrych dim byd tebyg i'r hyn a fodolai ym 1998, pan ddaeth PDC yn ofyniad statudol.</li> <li>• Yr hyn sydd heb newid fodd bynnag yw ymrwymiad ac ymgysylltiad yr holl bartneriaid. Mae presenoldeb da bob amser mewn cyfarfodydd chwarterol, ac nid yw un cyfarfod wedi'i ganslo mewn dros 20 mlynedd - hyd at gyfyngiadau diweddar Covid 19.</li> <li>• Mae partneriaid ac Aelodau Lleol sy'n mynychu'r cyfarfodydd yn cyfrannu'n gadarnhaol, ac mae data chwarterol ar ffigurau troseddau a diweddariad ar ein cynlluniau ar gael ym mhob cyfarfod.</li> <li>• Mae pob aelod cyfrifol o'r bartneriaeth yn cyfrannu'n ariannol i gael dadansoddwyr partneriaeth, fel y gellir darparu data rheolaidd er mwyn gallu gwneud penderfyniadau ar sail tystiolaeth.</li> </ul>

- Rhestrir rhai o'r prif newidiadau mae'r bartneriaeth wedi, ac yn parhau i'w hwynebu isod.
  - Colli grantiau lleol - mae'r holl grantiau a fyddai cynt yn dod i'r bartneriaeth, naill ai wedi dod i ben, neu wedi symud i fod yn grant ranbarthol ac yn cael ei rheoli ar sail Gogledd Cymru. Fodd bynnag, trwy sicrhau ein bod yn chwarae ein rhan yn y strwythur ranbarthol, mae arian yn dal i gael ei sicrhau yn lleol, gan gynnwys cyllid ychwanegol yn y 18 mis diwethaf ar gyfer cam-drin domestig / trais rhywiol a chamddefnyddio sylweddau, yng Ngwynedd ac Ynys Môn.
  - Colli cydlynwyr lleol - collwyd rhai swyddi oherwydd bod cyllid wedi'i dynnu'n ôl, daeth eraill yn adnodd ranbarthol. Fodd bynnag, trwy gynnal aelodaeth agos a phwrpasol o'r grwpiau ranbarthol, rydym yn hyderus bod anghenion lleol wedi'u hymgorffori ym mhob cynllun a gweithgaredd ranbarthol.
  - Y prif heriau yr ydym i gyd yn eu hwynebu wrth gwrs, yw wyneb newidiol troseddu yn ein cymunedau heddiw. **Er bod Gwynedd ac Ynys Môn yn parhau i fod ymhlith y lleoedd mwyaf diogel i fyw**, rydym yn wynebu'r un materion â phob ardal arall yn y DU. Mae troseddau heddiw yn bellgyrhaeddol a chymhleth, gyda'r defnydd o dechnoleg yn galluogi lefel o droseddau ecsbloetiol y gellir dadlau, na welwyd o'r blaen. Mae gangiau troseddau cyfundrefnol yn bodoli ledled y DU, y rhan fwyaf yn ymwneud â throseddau cysylltiedig â chyffuriau, ac mae'r gangiau hyn a elwir yn gangiau llinellau cyffuriau (county lines) wedi bod yn destun llawer o weithgaredd ymatebol yng Ngogledd Cymru.
- Yn ystod 2019-20, fe wnaeth heddlu Gogledd Cymru arwain ar waith paratoi asesiad anghenion ranbarthol ar linellau cyffuriau, gan ddod â sefydliadau ledled y ranbarth ynghyd (mynychodd bron i 200 o bobl un cyfarfod) o hynny, datblygwyd cynllun ymateb ranbarthol, sydd bellach yn esblygu i weithgaredd lleol. Yn yr un cyfnod (ac yn parhau) mae heddlu Gogledd Cymru wedi cynnal nifer o weithrediadau gorfodi llinellau cyffuriau, sydd wedi cael effaith fawr ar weithgaredd y 'gangiau troseddol' yn yr ardal.
- Mae cynllun 2019-20, sydd ynghlwm, yn coladu'r rhan fwyaf o'r gweithgaredd ychwanegol yr oedd y bartneriaeth eisiau ei gyflawni yn ystod y flwyddyn ariannol honno. Cwblhawyd y gweithgaredd, ac adroddwyd arno bob chwarter i'r PDC, fel y gellir cytuno ar unrhyw weithgaredd adferol pe bai angen. Rhannwyd ffigurau troseddau bob chwarter hefyd, fel y gellir trafod unrhyw weithgaredd ychwanegol a bu angen.
- Mae gweithio rhwng partneriaid yn sylfaenol i ddiogelwch cymunedol. Y prif reswm dros gyflwyno PDC yn ôl ym 1998, oedd sicrhau bod trosedd ac anhrefn yn cael ei ystyried yn 'broblem pawb' ac nid maes i'r Heddlu yn unig.

	<p>Ni fu'r cydweithio rhwngartneriaid allweddol, yn y sector cyhoeddus a'r trydydd sector erioed mor gryf. Mae yna enghreifftiau diddiwedd o'r cydweithio rhwng sefydliadau, sydd bellach yn digwydd yn ddyddiol fel mater o drefn. Fodd bynnag, nid oes lle i hunanfodddhad, ac mae'r cynlluniau presennol yn dal i gynnwys bwriadau i symud i fwy fyth o weithio ar y cyd.</p> <ul style="list-style-type: none"> <li>• Yn anffodus, trwy gydol y cyfnod adrodd hwn, mae'r bartneriaeth wedi parhau gyda dau adolygiad marwolaeth domestig (AMD).</li> <li>• Ar ddiwedd blwyddyn ariannol 2019-20, cafodd y bartneriaeth weithdy, i ddechrau'r gwaith o gynllunio ar gyfer y flwyddyn i ddod. Digwyddodd hyn ym mis Chwefror, a hwn oedd cyfarfod corfforol olaf y bartneriaeth yn lleol, cyn dechrau'r cau-lawr ym mis Mawrth 2020.</li> </ul>
<b>6.00</b>	<b>2020-21</b>
	<ul style="list-style-type: none"> <li>• Er bod llawer wedi newid o ran arferion gwaith yn ystod mis Mawrth, ac i mewn i fis Ebrill, fe wnaethom lwyddo i lunio gweithgaredd y gweithdy yn gynllun gweithredu erbyn dechrau'r flwyddyn ariannol hon. Mae'r cynllun ynghlwm.</li> <li>• Canslodd y bartneriaeth y cyfarfod a drefnwyd ar gyfer mis Ebrill, ac yn lle hynny dosbarthwyd LOG - yn cynnwys y ffigurau troseddau am y cyfnod, a'r holl bapurau a materion eraill a oedd angen sylw'r aelodau. Mae'r gweithgaredd hwn wedi parhau ers hynny, gyda LOG 2-3 wythnosol yn cael ei rannu, a materion sy'n codi yn cael eu hamlygu i gael sylw. Ail ddechreuwyd cyfarfodydd yn mis Gorffennaf, gan ddefnyddio dulliau rhithiol.</li> <li>• Mae'r cynllun yn cael ei fonitro, ac yn ôl y disgwyl rydym yn gweld rhywfaint o weithgaredd yn cael ei oedi oherwydd sefyllfa Covid 19. Y bwriad yw ein bod yn ceisio nodi unrhyw gyfleoedd newydd sy'n codi o'r cyfnod cyfredol a lliniaru effeithiau posibl unrhyw weithgaredd na fydd yn digwydd. Mae'n ddyddiau cynnar eto, o ran dadansoddi gwersi i'w dysgu ac arfer gorau.</li> <li>• Yn gynnar iawn yn y cyfnod cloi, gwelsom, yn ôl y disgwyl, ostyngiad yn y cyfraddau troseddu cyffredinol ar draws y Siroedd, erbyn dechrau mis Mehefin - roedd y cyfraddau troseddu yn gyffredinol o gymharu â'r un cyfnod y flwyddyn flaenorol i lawr - 24.6% yng Ngwynedd a 24.8% yn Ynys Môn. Roedd y gostyngiadau yn amrywio ar draws y mathau o droseddau gyda throseddau meddiangar a threisgar yn gweld y gostyngiadau mwyaf.</li> <li>• Ers hynny, mae cyfraddau troseddu wedi bod yn ymgripio'n araf tuag at y lefelau disgwylidig. Mae cam-drin domestig (CD), a oedd yn fater y gwnaethom gadw trosolwg agos ohono yn ystod y cyfnod cloi, am resymau amlwg - unwaith eto yn agosáu at niferoedd mwy disgwylidig o ran niferoedd. Yn ffodus, fel y soniwyd yn flaenorol, rydym wedi gallu manteisio</li> </ul>

ar yr arian ychwanegol gan Lywodraeth Cymru i roi mwy o ddarpariaeth ar waith ar gyfer anghenion CD a cham-drin rhywiol.

- Yn ystod y misoedd sy'n weddill o'r flwyddyn ariannol hon, ein nod yw parhau â chyfarfodydd rhithwir a rhannu gwybodaeth yn rheolaidd, er mwyn cadw'r cynllun ar y trywydd iawn cyn belled ag y bo modd. Ein nod hefyd yw dysgu o'r 'ymateb' i'r cyfnod cau-lawr, sydd, heb os, wedi gweld arfer da ac arloesodd.

Ers datblygu'r bartneriaeth statudol hon o dan Ddeddf 1998, mae cydweithio rhwng y gwahanol sefydliadau cyhoeddus a thrydydd sector wedi newid yn ddramatig. Tydi'r ffaith bod rhai o'r partneriaid cyfrifol wedi'u datganoli a rhai ddim, bod rhai meysydd gwaith yn cael eu harwain gan Lywodraeth Cymru, ac eraill gan Lywodraeth y DU, ddim wedi rhwystro cynnydd gweithio ar y cyd, sydd fel y soniwyd eisoes, bellach wedi'i ymgorffori yn ymarfer gweithio bob dydd.

Er hynny, nid oes amheuaeth bod sefyllfa ddiweddar Covid 19 wedi, ac yn parhau i fod yn gyfnod heriol i'r holl bartneriaid. Isod mae enghreifftiau o sut bu ymateb i rai o'r heriau hyn.

- Yn anffodus, yng Ngwynedd, roedd angen cynnal adolygiad Dynladdiad Domestig (sy'n gyfrifoldeb PDC) yn dilyn marwolaeth ym mis Rhagfyr 2019. Rhoddodd y Swyddfa Gartref ryddid i bartneriaethau 'ddal' ar y broses yn ystod y cyfnod cloi. Fodd bynnag, roedd partneriaid yn awyddus i wneud cynnydd, a chan ddefnyddio cyfarfodydd rhithwir yn lleol a gyda sefydliadau o ddwy Sir arall ledled y DU, rydym wedi cadw at yr amserlen y byddem wedi'i wneud, serch y rhwystrau presennol.
- Yn gynnar yn y cyfnod Cloi, cydnabuwyd bod angen bod yn wylidwrus o ran Cam-drin Ddomestig (DA). Mae dioddefwyr risg uchel CD yn cael eu trafod mewn cyfarfod amlasiantaethol bob mis, fel arfer safonol. Cytunodd partneriaid y byddai cyfarfodydd rhithwir wythnosol hefyd yn cael eu cynnal, fel y gellir delio â ffactorau risg yn gyflym. Mae'r cyfarfodydd hyn yn parhau.
- Daeth diwallu anghenion ein dinasyddion digartref yn flaenoriaeth yn gynnar yn y cyfnod cloi, nid yn unig yn darparu tai i bob un, ond hefyd yn diwallu anghenion eraill y gallent eu cyflwyno. Cynyddodd ein gwasanaethau camddefnyddio sylweddau'r ddarpariaeth 'allgymorth' sydd ar gael, gan weithio ochr yn ochr â'r heddlu a gwasanaethau tai ar lawr gwlad, gan ymgysylltu â phob unigolyn. Roedd darparu ar gyfer yr anghenion hyn yn sicrhau eu bod yn parhau i ymgysylltu â gwasanaethau ac o ganlyniad yn cyfeirio ac yn ymgysylltu o fewn gwasanaethau triniaeth mwy strwythuredig. Darparwyd gwerth ychwanegol trwy ddarparu bwyd poeth ac eitemau sylfaenol, ffonau symudol lle nad oedd ganddynt fynediad at un, a ticedi teithio i'w galluogi i fynd i apwyntiadau a derbyn cefnogaeth bellach yn ôl yr angen.
- Cynyddodd ein gwasanaethau tai a gofal cymdeithasol y nifer y cyfarfodydd (rhithwir) gyda phartneriaid yn y trydydd sector / camddefnyddio sylweddau / a'r gwasanaeth Prawf, er mwyn trafod unigolion yn y gymuned a oedd yn destun goruchwyliaeth Prawf. Mynd i'r afael ag anghenion a rheoli risg oedd

	<p>y nod i raddau helaeth, ar adeg lle nad oedd cyswllt wyneb yn wyneb bob amser yn bosibl.</p> <ul style="list-style-type: none"> <li>• Hefyd, wrth i gyfarfodydd goruchwylio wyneb yn wyneb â chleientiaid yn y gymuned o fewn swyddfeydd ddod yn anodd i'r gwasanaeth prawf (fel gyda phob darparwr arall) yn ystod dyddiau cynnar cloi, mae'r Gwasanaeth Prawf a'r heddlu'n cryfhau eu harferion gweithio ar y cyd, mwy o ddefnydd o Safleoedd heddlu ac ymweliadau stopio drws ar y cyd, er mwyn sicrhau bod rheolaeth risg yn cael ei chynnal yn ystod y cyfnod.</li> <li>• Yn ystod y cyfnod Cloi, derbyniodd partneriaid ddata ar dueddiadau trosedd pob 2-3 wythnos, yn hytrach na'r monitro chwarterol sy'n safonol. Roedd hyn yn galluogi'r partneriaid i ymateb i dueddiadau neu faterion oedd yn dod i'r amlwg. Roedd y dadansoddwr partneriaeth hefyd yn gallu darparu data mwy manwl ar unrhyw faterion a nodwyd, fel ein bod i gyd yn deall sut y gallai newid ymatebion. Enghraifft o hyn, oedd nodi cynnydd mewn math o achosion 'aflonyddu' yn ymwneud â defnyddio cyfryngau cymdeithasol. Ar hyn o bryd, mae'r bartneriaeth yn edrych ar ba ymgyrchoedd ymwybyddiaeth ychwanegol y gallem eu datblygu i hysbysu pobl o'r angen am ddefnydd cyfrifol o gyfryngau o'r fath.</li> </ul>
<b>7.00</b>	<b>ARGYMHELLION</b>
7.01	Nodi cynnwys yr adroddiad a'r dogfennau atodol, a nodi p'un a yw'r Pwyllgor Craffu yn cefnogi'r blaenoriaethau a chyfeiriad y gwaith i'r dyfodol.
<b>8.00</b>	<b>ATODIADAU</b>
8.01	<ol style="list-style-type: none"> <li>1. Cynllun 2019 -20</li> <li>2. Cynllun 2020 -21</li> </ol>